

FANOMANANA FIFIDIANANA TSY TOMOMBANA

Hisy ny fanapahan-kevitra politika lehibe ho raisina raha miziriziry ny fitondrana

Nanao fanambarana tao amin'ny Radio sy ny televiziona MBS omany ny filoha Marc Ravalomanana, mahakasika ny tsy fahatomombanana amin'ny fikarakarana fifidiana...

"Ho taom-pifidianana ny taona 2023 izay hatrehintsika afaka andro vitsy. Hita sy tsapa anefa fa tsy lavorary, tsy milamina ary tsy azo antoka ny tontolo manodidina ny fanomanana ny fifidianana ankehitriny. Tsy hita taratra ny fahavononan'ny Mpitondra hanatanteraka fifidianana madio sy milamina. Antoko politika tompon' andraikitra ary mametraka hatrany ho lohalaharana ny tombontsoa ambonin'ny Firenena ny Antoko TIM. Noho izany dia tsy hainay ny hangina manoloana ny loza mitatao ho an'ny Demokrasia sy ny raharaham-pirenena ankapobeny eto Madagasikara.

Ho fisorohana ny savorovoro sy ny korontana mety haterakin'ny fifidianana ratsy fanomanana sy tsy andrasan'ny rehetra anjara dia manao izao fanambarana izao izahay milaza ireo zava-misy ary mitondra ireo soso-kevitra ho fanatsarana.

MIKASIKA NY FANDRAFETANA NY LISITRY NY MPIFIDY:

Tsy tomombana sy tsy mizotra araka ny tokony ho izy ary tsy mahazo ny faharisihan'ny rehetra ny fanavaozana manontolo ny Lisitry ny Mpifidy atao ankehitriny. Noho izany dia ho sarotra ny hahazoana Lisitry ny Mpifidy feno sy madio hanatanterahana ny fifidianana amin'ny taona 2023 raha izao zava-misy sy fomba fiasa izao no mitohy.

Tsy fahamatorana ny fikasana hanalava ny fotoana hanavaozana manontolo ny Lisitry ny Mpifidy. Ho fanatsarana ny fandrafetana ny Lisitry ny Mpifidy dia arosonay ny tokony :

- Hanatanterahana ny fanavaozana manokana (Révision spéciale) ny Lisitry ny Mpifidy manomboka ny fotoana hivoahan'ny Dimpanjakana miantso ny Mpifidy handatsa-bato ka mifarana 30 andro mialohan'ny andro fandatsaham-bato

- Hanomezana malalaka ny antoko sy fikambanana politika rehetra hanao ny fanentanana ny fiainana ara-politika manerana ny nosy izay zo omen'ny Lalàna azy ireo rahateo.

- Hanajanonana tsy misy hatak'andro ny fanaovana « jugement supplétifs » sy ny fanaovana karapanondrom-pirenena faobe satria mety hiteraka hosoka sy tsy fifampitokisana.

MOMBA NY TETIANDROM-PIFIDIANANA SY NY TETI-BOLA HANATANTERAHANA IZANY:

Tsy hita mazava ao amin'ny Lalàna mifehy ny Tetibolam-panjakana ireo Fifidianana tokony hatao amin'ny taona 2023 dia ny Fifidianana Filoham-pirenena sy ny Fifidianana Ben'ny Tanàna sy Mpanolo-tsaina eny anivon'ny Kaominina.

Tsy ampy hanatanterahana ireo Fifidianana tokony hatao ny Tetibola voasoratra hanatanterahana izany amin'ny taona 2023 raha ampitahaina amin'ny teo aloha sy ny fanambaran'ny CENI.

Ny fanontaniana mipetraka dia ny hoe : Ny CENI ve no tsy nampahafantatra ny Governemanta ireo Fifidianana tokony hatao amin'ny taona 2023 sy ny teti-bola hanatanterahana izany, sa ny Governemanta no tsy niraharaha izay soso-kevitra naroson'ny CENI ?

Tsy azo ekena ny mety ho fikasana handika ny Lalampanorenana sy ny Lalàna velona eto amin'ny Firenena ka hanitarana ny fepotoam-piasana na ho an'ny Filoham-pirenena na ho an'ny Ben'ny Tanàna sy ny Mpanolo-tsaina eny anivon'ny Kaominina.

Noho izany dia takinay ny hanambaran'ny Governemanta mazava ireo Fifidianana ho tanterahina amin'ny taona 2023 sy ny fanokanana vola ampy hanatanterahana azy ireo mifanaraka amin'ny fenitra iraisam-pirenena.

MIKASIKA IREO LALANA SY RAFITRA MIFEHY SY MITSARA NY FIFIDIANANA:

Ny Lalampifidianana misy ankehitriny dia tsy feno sy tsy manome antoka ny fitovian-jon'ny Kandida rehetra, ny fangaraharana sy ny fahazivonan'ny fifidianana, ny tsy fiandanian'ny fanjakana ary ny fanasaziana izay mandikika Lalàna.

Tsy azo antoka ny fahaleovantena sy ny tsy fiandanian'ireo rafitra mikarakara sy mitsara ny Fifidianana.

Na dia teo aza ny antso sy ireo soso-kevitra naroso ho fanat-

sarana ireo Lalàna mifehy ny fifidianana sy ny rafitra mikarakara sy mitsara ny Fifidianana eto amintsika avy amin'ireo sehatra maro samihafa eto an-toerana sy avy any ivelany dia tsy misy hatramin'izao ny finjavana avy amin'ny Fitondrana hihaino sy hitondra fanavaozana.

Hamafisinay hatrany fa tsy hahafahana hanatanteraka fifidianana madio sy hanome vokatra eken'ny rehetra ireo Lalampifidianana sy rafitra misy ankehitriny.

IREO TSY FANARAHAN-DALANA MISEHO:

Betsaka ireo tsy fanarahan-dalàna miseho ankehitriny manoloana ny fiomanana hiatrika ny fifidianana :

- Ny fanaovan'ny Mpitondra fampielezan-kevitra mialohan'ny fotoana sy ny fampiasana ny volam-panjakana, ny fananam-panjakana ary ny Mpiasam-panjakana ho amin'izany fampielezan-kevitra mialohan'ny fotoana izany.

- Ny fanakatsakanana sy fanaovana ramatahora ny Antoko Politika Mpanohitra tsy hanatanteraka ireo hetsika politika ho fana-beazamboho ny Antoko sy fiomanana amin'ny Fifidianana.

NOHO IREO VOALAZA REHETRA IREO DIA:

-Manambara izahay fa ny fifidianana dia fifinanana demokratika, noho izany dia fitsipika tokony hifanarahana sy mampitovy zo ny Mpifaninana no hampiharina mba haneken'ny rehetra ny vokatra

-Mbola manamafy ny antso avo ny tokony hanatanterahana ny fikaonandoham-pirenena izahay mba hametrahana izay fitsipika hifehezana ny fifidianana ifanarahana sy mampitovy zo ny Kandida rehetra.

-Manainga ny tompon'andraikitra sy ny mpisehatra mikasika ny fifidianana noho izany mba handray ny andraikitra rehetra ahafahana mirosy amin' ny fifampiresahana mba hanaanana lisitry ny mpifidy feno sy madio, lalàm-pifidianana ifanarahana ary rafitra hiantana sy hitsara ny fifidianana atokisan'ny rehetra

-Manamafy izahay fa ny fanatanterahana amboetra ny fifidianana miaraka amin'ireo tsy fahatomombanana misy ankehitriny ireo dia tsy hitondra filaminana sy fahamarinan-toeran'ny Demokrasia eto amintsika fa hitarika korontana sy fisaraham-bazana eto amin'ny Firenena.

-Manaitra ny vahoaka rehetra handray andraikitra manoloana izao loza efa mihatra eto amin'ny firenena izao izay mandavo ny vahoaka no sady mamono tanteraka ny Demokrasia sy ny tany tan-dalàna.

Eto am-pamaranana, dia manome toky izahay fa tsy hamela ho irery ny Vahoaka Malagasy manoloana izao zava-misy feno fahasahiranana sy fahantrana izao fa hikoroka ny fomba rehetra sy hanao izay azo atao rehetra hitandroana ny tombontsoa ambonin'ny Firenena. Miantso ny Vahoaka Malagasy tsy hamoy fo na ho very fanantenana fa hanana FINOANA hatrany ka ho vonona handray andraikitra hatrany.

Noho izany, raha tsy misy ny fepetra raisina hanarenana maika izao tontolo manodidina ny fifidianana misy ankehitriny izao dia handray fanapahan-kevitra ara-politika lehibe mikasika ny zotram-pifidianana rehetra eto amin'ny firenena izahay."

Nangonin'Isambilo

Depiote Roland Ratsiraka

Maha menatra fa tsy misy vola ny fanjakana

Naneho ny heviny mahakasika ny raharaham-pirenena amin' izao fotoana ny depiote voafidy tany Toamasina I, sady filoha nasionalin'ny antoko MTS, Roland Ratsiraka. Namberany tamin'izany fa maha menatra ny zava-misy eto amintsika amin' izao fotoana, satria tsy manambola ny fanjaka-na. Manaporofy izany hoy ity olom-boafidy ity,

tsy lasa ny delegasionina tokony ho nandeha tany amin'ny Nosy Maorisny hiatrika ny lalaoan'ny CJSOI. Niantso taty anefa hoy izy ny Maorianina, gaga sy talanjona izy ireo, satria isika no tokony handray ny Jeux des Iles, na ny Lalaoan'ny Nosy aty amin'ny faritry ny Ranomasimbe Indiana amin'ny taona ho avy 2023. Ny tsy fivahan'ny

olan'ny Jirama amin'ny delestazy ankehitriny koa hoy ny depiote Roland Ratsiraka dia mampiseho izay tsy fananan'ny fitondrana vola izay. Ambonin'izany, tsy vitsy ireo mission, na fivoahana any ivelany voatery najanona. Tsy voalao ny karaman'ny mpampianatra, ny vatsim-pianaran'ny mpianatra, na eto an-toerana, na any ive-

lany. Tsy voalao ny karaman'ny mpiasan'ny Ante-nimierandoholona, mahatonga ny fitokonan'izy ireo. Ho tonga hatraty amin'ny Antenimierampirenena io, tsy fananan'ny fanjakana vola io, hoy ihany ny depiote Roland Ratsiraka.

Stefa

Depiote Todisoa sy fanalana ny Praisinistra

Tsy misy IRD, na TIM, na Tsy Miankina, miray feo ny depiote

Manoloana ny fahasahiranana mahazo ny vahoaka Malagasy ankehitriny dia nampika-peo ny solombavambahoaka maro tao Tsimbazaza , ka nanao fianjantsoana manokana ny Praisinistra Ntsay Christian sy ny Minisitry ny vola eto amin'ny tany sy ny firenena hoy ny solombavambahoaka TIM, Todisoa Andriamapandry . Ny mahatonga an'izay hoy izy dia be

dia be no tezitra ireo Solombavambahoaka-ka amin'ny fahasahiranana mahazo ny vahoaka Malagasy amin'izao fotoana izao, nefa toa tsy mba misy vahaolana raisin'ny mpitantana dia ny firenena. Efa mijaly ny Vahoaka amin'ny lafiny maro toy ny vidim-piainana miakatra andro aman'aina. Ny asa tsy misy , eo ihany koa ny tsy fandiampahalemana, ny jiro sy

rano tapaka lava ary ny mosary isan-karazany. Ity izao hoy ny depiote Todisoa Andriamampianina no kirizy mafy sy ratsy indrindra hatramin' izay nahazoana ny faha-60 taonan'ny fahaleovantena izay. Ankoatra izay, tsy omen'ireo mpanatanteraka ny haja maha solombavambahoaka, izany hoe toerana amin'ny maha olom-boafidy azy. Rehefa mba miresaka ianao

amin' ny Praisinistra na minisitry dia ohatran'ny hoe tsy misy vidiny , tsy asiany sira izany hoe solombavambahoaka izany. Ny Mpandrahaha izao dia tsy omena azy ny zony , ny avantage izay tokony ho azony. Eo amin'ny sehatry ny asa amin'ny Antenimierandoholona indray dia tara lava ny karama, nefa mpiasa ireo ary mamelom-bady amanjanaka. Ny zo kely 13 eme

mois tsy omena. Raha tsy misy an'ireo mpiasa ireo anefa dia tsy mandeha izany institution izany. Dia ohatr' izay ihany koa ny Solombavambahoaka tsy vitan' ny hoe ny vahoaka no ampifilafilaina sy ampijaliana, fa ilay mitondra ny feon'ny vahoaka ihany koa. Tsy misy intsony ny hoe TIM ity, na IRD ity, na indépendant ity, fa miray feo ny Solombavamba-

hoaka ankehitriny hanaovana an'izao Interpellation an'Andriamatoa Praisinistra sy ny Minisitry ny finance, satria gaborarako loatra ny fitantanana. Tonga ny fotoana ampahafantarany an'izy ireo, hoe manana ny hajany izahay solombavambaho-aka, hoy ihany ny depiote Todisoa Andriamapandry.

Helisoa

Ny Valosoa sy fakafaka

Betsaka ny tsy rariny ataon-dRajoelina sy ny ekipany

Betsaka ny tsy rariny ataon-dRajoelina sy ny ekipany amin'izao taona madiva hifarana izao. Mibahana ny sain'ny maro ohatra ny tsy fandraisana anjara atsy amin'ny Nosy Maurice amin'ny lalaon'ny Cjsoi, izay fingana lehibe tena manala baraka ny firenena tokoa, satria diso fanantenana ireo mpan-drainy anjara izay efa niomana tamin'ny lafiny rehetra tokoa, nefa dia tsy nomen'ilay minisitry ny fanatan-jahantena rariny akory na dia kely fotsiny aza, nataony toy ny izy mbola minisitry ny fitaterana hatrany: "Tsy mahazaka, tsy mahafehy ny ministera iandraiketany". Tsy afaka ao an-tsain'ny maro koa ny grevy etsy sy eroa, vokatry ny tsy fahaiza-mitantana ny volam-panjakana, teo ohatra ny volan' ireo mpiasa eny amin'ny fampianarana ambony, ny karaman'ireo mpiraki-draharaha eny amin' ny fitsarana, eo koa ny volan'ireo mpiasa eny amin'ny Antenimierandoholona, sy ny sisa..., izay efa fambara loza mihitsy hoan-dRajoelina sy ny ekipany, raha atao indray mijery. Ny lafiny fitaterana, gaga ny rehetra hatramin'izao, fa mbola tsy nahatazana izany fiara vaventy fitaterana miisa 1000 isa izany tamin'ny volana novambra lasa teo iny, tapenamaso koa ny rehetra momba ny trangan-javatra ao amin'ny Air Mad ao, sy ny tsy rariny ataon-dry Rinah Rakotomanga, nefa dia mahafatifaty ity filoha tsy mato-tsaina ity hatrany, porofon'izany koa ny fanaovana lalambe migodana mampitohy an'Antanana-rivo sy Toamasina, nefa mbola marobe ireo lalana mila fanamboarana sy hatsaraina na harenaina be, toy ny any Anosibe An'ala, Ikongo, Ambatomainty, RN2, RN7, RN6, sy ny sisa... Ny mahamaika andRajoelina dia ny hanaovana ny lalana 100km/ora na hahita fanenjika amin'izany lalana izany, nefa raha misy loza tsy ampoizina mitranga dia fahafaham-baraka koa izany. Ora 2 sy sasany no heveriny hanaovana izany 260 km izany, nefa Antsirabe 165km aza mbola any amin'ny 3 sy sasany na ora 4, na maherin'izany vao vita. Ny lalana efa ratsy, tsy asiana fanamboarana akory nefa mba lalam-pirenena ihany. Tsorina fa misy fetrany koa ny hafainganam-pandehan'ny fiara, ka raha 70km/ora no sahaza ny iray dia tsy tokony ianao filoha indray no hamporisika ny olona handeha 100km/ora na miohatra izany. Ny fanonerana ny tanimbary, na ny tanin'ny olona mety ho lalovan'izany lalambe migodana izany koa dia mbola tsy fantatra ny mahakasika an'izay.

Beharo